

Ո Ր Ո Շ ՈՒ Մ

Ճանապարհային ոստիկանության վարչական իրավախախտման գործի վերաբերյալ
28.05.2020թ. կայացված թիվ 00256-4 որոշումն անփոփոխ, իսկ վարչական բողոքն
առանց բավարարման թողնելու մասին

<<03>> 07 2020թ. 7-13- 7445

ք.Երևան

Ճանապարհային ոստիկանության պետ, ոստիկանության գնդապետ Ե.Կարապետյանս,
վերանայելով Հովհաննես Երիցյանի ՄԴ/42701-20 դիմումի քննարկման արդյունքում
ստեղծված նյութերը՝

Պ Ա Ր Զ Ե Ց Ի

Երևան քաղաքի Ավան Առինջ 1-ին միկրոշրջանի 2/8 շենքի 18 բնակարանի բնակիչ
Հովհաննես Երիցյանը դիմումով խնդրել է բեկանել Ճանապարհային ոստիկանության
վարչական իրավախախտման գործի վերաբերյալ 28.05.2020թ. կայացված թիվ
00265-4 որոշումը՝ նշելով, որ երթևեկել է ընտանիքի անդամների հետ, ինչպես նաև ունի
առողջական խնդիր և դիմակի կրումը առաջացնում է շնչառական խնդիրներ, այդ
պատճառով համաձայն չէ որոշմամբ արձանագրված իրավախախտման հետ:
Միաժամանակ հեռախոսակապի միջոցով հայտնել է, որ դիմումին ավելացնելու ոչինչ
չունի:

<<Վարչարարության հիմունքների և վարչական վարույթի մասին>> օրենքի 43-րդ
հոդվածի 3-րդ մասի համաձայն, եթե նույն հոդվածի 1-ին մասի «բ» կետով նախատեսված
դեպքում վարչական մարմնի կողմից քննարկվող փաստական հանգամանքների
վերաբերյալ տվյալներին (տեղեկություններին) վարչական մարմինը կարող է իրազեկ
դառնալ բացառապես տվյալ անձի միջոցով, ապա ապացուցման պարտականությունը
դրվում է այդ անձի վրա:

Դիմումի քննարկման արդյունքում պարզվել է, որ վարչական իրավախախտման
գործի վերաբերյալ 28.05.2020թ. կայացված թիվ 00256-4 որոշումը ենթակա է կատարման
հետևյալ պատճառաբանությամբ.

Վարչական իրավախախտումների վերաբերյալ ՀՀ օրենսգրքի 182.3-րդ հոդվածի 1.1
մասի համաձայն՝ արտակարգ իրավիճակի հիմքով հայտարարված արտակարգ դրության
ընթացքում ազատ տեղաշարժվելու պայմանները, պահանջները խախտելը՝ առաջացնում է
տուգանքի նշանակում՝ սահմանված նվազագույն աշխատավարձի տասնապատիկի
չափով:

Հայաստանի Հանրապետության ողջ տարածքում կիրառվող ժամանակավոր
սահմանափակումների վերաբերյալ պարետի 03.05.2020թ. N63 որոշման 5-րդ կետի
համաձայն՝ ՀՀ տարածքում պարտադիր է հանրային բաց վայրերում դիմակի
առկայությունը, իսկ անձնական օգտագործման մարդատար և բեռնատար
տրանսպորտային միջոցներում՝ դիմակ կրելը, եթե վարորդից բացի մեքենայում առկա է
առնվազն մեկ ուղևոր:

Ուսումնասիրությամբ պարզվել է, որ 28.05.2020թ. Երևան քաղաքում քաղաքացի Հովհաննես Երիցյանի վարած ավտոմոբիլը կանգնեցվել է Ճանապարհային ոստիկանության ուղեկցող սպայական վաշտի 3-րդ սպայական դասակի ավագ տեսուչ, ոստիկանության մայոր Ս.Մկրտչյանի և նույն դասակի տեսուչ, ոստիկանության կապիտան Հ.Թադևոսյանի կողմից՝ Հայաստանի Հանրապետության պարետի 03.05.2020թ. N 63 որոշման 5-րդ կետի պահանջի խախտման համար, այն է՝ վարորդը և ուղևորը անձնական օգտագործման մարդատար տրանսպորտային միջոցում չեն կրել դիմակ: Վարչական իրավախախտումների վերաբերյալ ՀՀ օրենսգրքի 182.3-րդ հոդվածի 1.1 մասով կայացվել է վարչական իրավախախտման գործի վերաբերյալ թիվ 00256-4 որոշումը:

Ճանապարհային ոստիկանության ծառայողների կողմից տրված պարզաբանման համաձայն՝ քաղաքացի Հովհաննես Երիցյանի կողմից կատարված իրավախախտումը հիմնավորող՝ տեխնիկական միջոցների կիրառմամբ ձեռք բերված ապացույցներ առկա չեն, սակայն իրավախախտումն եղել է անմիջապես իրենց տեսադաշտում, ակնհայտ և պարզ տեսանելի, ինչի կապակցությամբ կազմվել է համապատասխան արձանագրություն և

կայացվել թիվ 00256-4 որոշումը: Միաժամանակ ոստիկանության ծառայողները հայտնել են, որ իրենց և վարորդի միջև ծառայողական բնույթի խոսակցություններից բացի այլ խոսակցություններ չեն եղել:

Այսպիսով, դիմումատուի արարքում առկա են Վարչական իրավախախտումների վերաբերյալ ՀՀ օրենսգրքի 182.3-րդ հոդվածի 1.1 մասի հատկանիշները, ուստի ելնելով վերոգրյալից և ղեկավարվելով Վարչական իրավախախտումների վերաբերյալ ՀՀ օրենսգրքի 293-րդ հոդվածի 1-ին մասի 1-ին կետով՝

Ո Ր Ո Շ Ե Ց Ի

1. Ճանապարհային ոստիկանության վարչական իրավախախտման գործի վերաբերյալ 28.05.2020թ. կայացված թիվ 00256-4 որոշումը թողնել անփոփոխ, իսկ վարչական բողոքն առանց բավարարման:
2. Սույն որոշումն ուժի մեջ է մտնում հանձնելու օրվան հաջորդող օրը և կարող է բողոքարկվել ՀՀ վարչական դատարան օրենքով սահմանված կարգով և ժամկետներում:
3. Սույն որոշման օրինակն ուղարկել Հովհաննես Երիցյանին և Ճանապարհային ոստիկանության ուղեկցող սպայական վաշտ:



Ե.Կարապետյան